



**Atuarfimmi pisortat perorsaannermi aqutsinissamut piffissaqarnerulernissaat anguniarlugu atuarfimmi allatsitut ilinniarnissamut periarfissaasut misissorneqarnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinermi piginnaasatigut nukittorsaannissamut pisariaqartitsineq nassuiarneqassaaq, ilinniarneq sorleq tulluunnerunersoq, aningaasartuutissatut kingunerisassai aammalu ilinniarfinni atuutereersuni ilinniarsinnaangornissaq periarfissaanersoq. Misissuinermi kingusinnerpaamik EM2021-mi saqqummiunneqartussamut soqutigisallit sammisamullu attuumassusillit ilanngunneqarniarsarissapput**

(Inatsisartunut ilaasortaq Nivi Olsen, Demokraatit)  
(siullermeernera)

Qujanaq Demokraatit Inatsisartuni ilaasortaaitaanut Nivi Olsenimut siunnersuummut, pisariaqartorujussuarmut.

Meeqqat atuarfiat unammilligassaqaqaaq, nassuerutigisariaqarparpullu, atuartut meeqqat atuarfianni atuarnerminni angusaat qaffasittumik taasassaangimmata. Ajoraluartumik paasisariaqarparput, qaffasissuseq suli appasippallaartoq nunani allani qaffasissutsinut sanilliullugu.

Tamanna tunngavigalugu pingaartuuvoq, maani Inatsisartuni uagut ataatsimoorluta suleqatigiillutalu ilungersornerput ingerlatiinnassagipput meeqqat atuarfianni qaffasissutsip pitsanngortinniarnanur. Ilisimavarput, suliniuteqartoqartoq, aamma ilisimavarput, meeqqat atuarfiannut attuumassuteqartut tamarmik meeqqat atuarfiata pitsaasumik ingerlanissaa suliniutigigaat.

Una siunnersuut meeqqat atuarfiata pitsanngorsarnissaannut alloriarnerusinnaavoq. Qularutissaanngilaq, atuarfiup pisortaata kialluunniit perorsaannikkut aqutsinikkullu aammalu meeqqat atuarfiata ineriartortinnissaanut itisiliinissaminut piffissaqarnerunissani qinissagaa.

Ajoraluartumik ullumikkut imaappoq, atuarfiit pisortaasa piffissaq annertuallaq allaffissornermut atortarlugu. Taakku suliassat iluaqutaasumik atuarfimmi allatsimit ilinniarluarsimasumit isumagineqarsinnaagaluarput. Taamaattumik siunnersuut una pitsaasuvoq, tassa atuarfimmi allatsimit ilinniartitsinissamik aallartitsisinnaanermut periarfissat misissornissaat. Demokraatit isumaqarput, atuarfiit pisortaasa suliaasa pitsaanerulernissaannut aammalu Meeqqat atuarfiini fagitigut qaffasissutsip pitsanngortinnissaanut alloriarnerusinnaasoq pingaarutilik.

Demokraatit maluginiarpaat, Naalakkersuisut akissuteqarnerminni allannguutissatut siunnersuuteqartut. Taanna allannguutissatut siunnersuut taperserusunnarpoq siunnersuummullu allaanerussuteqarpallaarani. Demokraatit siunnersuutip siulliup aamma Naalakkersuisut allannguutissatut siunnersuutaataa Kultureqarnermut, Ilinniartitaanermut, Ilageeqarnermullu ataatsimiititaliami oqaluuserinissaa qilanaaraat.